

共同經課-1 出埃及記二十章一節～十七節

1 上帝吩咐 chiah-ê 一切 ê 話講；2 我是耶和華，你 ê 上帝，bat chhoā 你 tùi 埃及地，tùi 做奴才 ê 家，出來 ê。3 我以外，你 m̄-thang 有別個上帝(=神明)。4 M̄-thang 為 tiòh 家已雕刻偶像，不論天頂、地上，kap 地下水內所有 ê 物，lóng m̄-thang 做 in ê 像；5 m̄-thang 敬拜 in，也 m̄-thang 服事 in；因為我耶和華，你 ê 上帝，斷斷 m̄容允用別個上帝(=神明)匹配我；怨恨我 ê，我歸咎伊 ê 罪，對父到 kiáⁿ，到三四代；6 疼我，守我誠命 ê，我施恩 hō伊，直到千代。7 M̄-thang lām-sám 稱耶和華你 ê 上帝 ê 名；因為 lām-sám 稱伊 ê 名 ê 人，耶和華的確無掠伊做無罪。8 Tiòh 記得安歇日，守伊做聖；9 六日內應該 tiòh 磨，做你一切 ê 工；10 獨獨第七日，就是 òng 耶和華你 ê 上帝來守 ê 安歇；chit 日你 kap 你 ê kiáⁿ、cha-bó-kiáⁿ、奴僕、奴婢、cheng-siⁿ，以及 tiàm tī 你中間 ê 出外人，一切 ê 工，lóng m̄-thang 做；11 因為六日內，耶和華創造天、地、海，kap hit 中間萬物，第七日就歇；所以耶和華賜福 tī 安歇日，設立伊做聖。12 Tiòh 孝敬你 ê 老父，你 ê 老母，hō你 ê 日子 tī 耶和華你 ê 上帝所賞賜你 ê 地，得 tiòh 久長。13 M̄-thang 害死人。14 M̄-thang 行姦淫。15 M̄-thang 偷 thèh。16 M̄-thang 做假 ê 干證，陷害你 ê 厝邊。17 M̄-thang 貪你 ê 厝邊 ê 厝，也 m̄-thang 貪你 ê 厝邊 ê bó、奴僕、奴婢、牛、驢，以及你 ê 厝邊一切所有 ê。

共同經課-2 詩篇十九篇

1 大衛 ê 詩；交 hō樂官。1) Chiah-ê 天講起上帝 ê 榮光，穹蒼報揚伊 ê 手所做 ê。2 Chit 日 tùi hit 日發出言語，Chit 暝 tùi hit 暝傳出知識。3 無言無語；In ê 聲無 thang 聽見。4 In ê 準繩遍 tī 天下，In ê 言語到 tī 地極。上帝 tī in 中間為 tiòh 日頭安置帳房。5 日頭親像新 kiáⁿ 婿出伊 ê 房，亦親像猛勇 ê 人歡喜走伊 ê 路。6 伊 tùi 天 ê chit-pêng 出，Sèh 到天 ê hit-pêng；無一項物 khng 密，無得 tiòh 伊 ê 熱氣。7 耶和華 ê 律法齊全，能 hō人 ê 心神活起來；耶和華 ê 干證確實，能 hō人 有智慧。8 耶和華 ê 教示正直，能 hō人 ê 心歡喜；耶和華 ê 命令清潔，能 hō人 ê 目矚光明。9 敬畏耶和華 ê 道理是清氣，永遠存在；耶和華 ê 判斷真實，一概是公義。10 比金，比 choē-choē 好金，khah thang 欣慕；比蜜，比蜂房滴落來 ê 蜜 khah 甜。11 Koh 你 ê 奴僕 tùi chiah-ê 受警戒；守 chiah-ê 有大賞賜。12 Chī-chūi 會知伊 ê 失錯 ah？求你除去我暗靜 ê 過失。13 求你阻止你 ê 奴僕，無故意犯罪；M̄准 hit-ê 罪惡管轄我；我就完全，免犯大罪。14 耶和華我 ê 石磐，救贖我 ê 主 ah；願我 ê 嘴所講 ê，心所想 ê，tī 你 ê 面前得 tiòh 接納。

共同經課-3 哥林多前書一章十八節～二十五節

18 因為十字架 ê 道理，沉淪 ê 人看做癡，咱得救 ê 人看做上帝 ê 權能。19 因為有記載講，我 beh 滅無智慧 ê 人 ê 智慧，也 beh 棄 sak 聰明 ê 人 ê 聰明。20 智慧 ê 人 tī tá-lòh？經學士 tī tá-lòh？chit 世間好辯論 ê 人 tī tá-lòh？上帝 kiám m̄是 hō世間 ê 智慧變成癡？21 因為世間既然 tùi in ê 智慧 m̄-bat 上帝，上帝就歡喜 tùi 所宣傳 ê 癡來救 chiah-ê 信 ê 人；這 lóng 是上帝 ê 智慧。22 因為猶太人求神蹟，希利尼人 chhē 智慧。23 但是阮傳釘十字架 ê 基督，tùi tī 猶太人是塞礙，tùi tī 外邦人是愚癡；24 但是 tùi tī 受召 ê，無論猶太、希利尼，基督做上帝 ê 權能，上帝 ê 智慧。25 因為上帝 ê 愚癡比人 khah 智慧，上帝 ê 軟弱比人 khah 勇壯。

共同經課-4 約翰福音二章十三節～二十二節

13 猶太人 ê poāⁿ 過節近 lah，耶穌上耶路撒冷。14 Tī 殿裡 tú-tiòh 有賣牛、羊、鴿á，亦有換錢 ê teh 坐。15 耶穌用索做鞭，趕 in kap 羊牛 lóng 出殿；koh chhia-tó 換錢 ê 人 ê 錢，péng-lin-tng in ê 桌；16 koh kā 賣鴿á ê 講，帶 chiah-ê 物去；m̄ thang 用我 ê 父 ê 厝做買賣 ê 厝。17 伊 ê 學生記得聖經有記，講，我為 tiòh 你 ê 厝心內親像火 tòh。18 猶太人就應伊講，你做 chiah-ê tai-chì，用甚麼神蹟 hō阮看？19 耶穌應講，Lín 毀壞 chit-ê 殿，我三日 beh koh 起伊。20 猶太人就講，Chit-ê 殿歷過四十六年 chiah 起好，亦你三日 beh koh 起伊 mah？21 若是伊 án-ni 講是 teh 論伊 ê 身軀 ê 殿。22 到伊 tùi 死人中 koh 活，伊 ê 學生 chiah 記得伊 bat án-ni 講；就信聖經 kap 耶穌所講 ê 話。